

¿D'onde vien l'8 de marzu como Día de la Muyer?

ANÓNIMO :: 09/03/2012

De toes y toos ye sabíu que l'8 de marzu ye'l Día Internacional de la Muyer, pa muchos seutores reivindicáu como'l Día de la Muyer Trabayadora, amestando asina'l componente fundamental de clas y el papel importante de la mujer nel ámbitu llaboral. Por un día, toles instituciones, partios políticos, asociaciones y organizaciones alcuérdense de les problemátiques de la mujer con independencia de la ideoloxía que se tea. Ciértamente, tamién hai coleutivos n'Asturies y en tol mundu que reivindiquen esti día pero faen un gran llabor a lo llargu l'añu de cara a la emancipación social y de xéneru de les mujeres, lo que ye dignu d'aplaudir y mos enseña'l camín a tomar. ¿ Pero d'onde vien esta data como "Día de la Muyer"?

A entamos del pasáu sieglu venti los movimientos feministes d'estremáu calter medraben por tol mundu, anqu'especialmente n'Europa, con mucha fuercia. Les reivindicaciones de les mujeres dende una perspectiva igualitarista yeran oyíes polos gobernantes, anque rara vez s'influía nel poder políticu, por nun decir nunca. La sociedá patriarcal tenía una cadarma xabaz contra la mujer y les sos reivindicaciones y munches militantes feministes fueron asesinaes, prindaes o torturaes. Entamose a tratar d'affitar un Día Internacional de la Muyer, siendo los primeros intentos el 28 de febreru y el 19 de marzu. Nun tuvieron muncho éxitu ciértamente estos dates.

L'8 de marzu ye emplegáu por primer vegada en 1913 poles mujeres ruses pa protestar contra la inminente I Guerra Mundial. Foi importante la represión que sufrieron eses mujeres na so protesta nesi 8 de marzu. Años dempués, en 1917, les mujeres tornen a salir a cai pa reivindicar los sos drechos, finar cola guerra imperialista que taben sufriendo y en solidaridá con tolos/es trabayadores de la fábrica Putilov, que 5 díes enantes dexó nel paru a unos 30.000 obreros/es. Esti 8 de marzu, nel que les mujeres ruses amosaron la so combatividá y el compromisu y solidaridá foi un dinamizador de cara derrocar el Zarismu Absolutista y facer la Revolución Social.

Tres la Revolución Socialista d'Ochobre de 1917, con un gran protagonismu femeninu, la mujer algamó'l drechu al votu, el divorciu y l'abortu. Alejandra Kollontai promovió l'8 de marzu como Día de la Muyer Trabayadora na URSS lo que algamó ensín torgues. Depués, pasu ente pasu l'8 de marzu foi adoptándose n'otros países como Día de la Muyer y el coleutivu feminista reivindicolu como tal. Paralelamente, la Organización de Naciones Unies (ONU) tardó en reconocer l'8 de marzu como Día de la Muyer más de 60 años.

La hestoria tapecía y manipulada.

Como se pue ver, la Revolución Socialista de 1917 yá tuvo un fondu calter de xéneru pa los años que trescurrién, con una mentalidá estremada a la qu'hai anguaño. El bloquéu de la ONU al 8 de marzu ye más que sinificativu y da a entender el pocu enfotu de los grandes muerganos capitalistes en reconocer la dignificación de la mujer, inda más si venía de la man del socialismu de Marx, Engels y Lenin.

Anguañu, dende los más facistes (agora lliberales o neo-lliberales) a los socialdemócrates anti-marxistes reconocen l'8 de marzu como propiu y reivindiquen como suyes dalgunas causes del feminismu, anque siempres dende la folclorización más absoluta y con pocu envís de tresformar la realidá y superar la sociedá patriarcal, inclusu faciendo un analis que ñega la esistencia del patriarcáu. Esto nos lleva a ver que nun se pue analizar la igualdá de xéneru ensin tener enantes un analis críticu de la realidá social de división de clases esistente ya interrelacionar dambes variables.

Poro, ye perimportante l'aporte del socialismu revolucionariu a la causa feminista y a la emancipación de la mujer, y tamién sinificativu que la sociedá burguesa coles sos estructures de poder tapeza esa aportación del socialismu a la hestoria de la humanidá y de la mujer, tanto como persona como ser social. Inevitablemente, la hestoria da lleiciones y nesti casu solo podemos sacar como conclusión que queda muncho por facer pa baltiar el patriarcáu y pa ello la llucha feminista tien de tornase en revolucionaria y saber comprender el trescursu y la evolución de la llucha de clases, pues les persones, mujeres y homes, son quien tienen de decatase de que la mujer ta doblemente oprimida: como mujer y como trabayadora. Y lo que ye entá pior, nel casu d'Asturies tríplemente, como asturiana tamién tien enriba la opresión nacional.

¡Puxa la mujer trabayadora!
¡Abaxu'l patriarcáu y el capital!

<http://www.glayiu.org/?accion=ver&tipo=noticia&id=15480>

https://www.lahaine.org/est_espanol.php?id-onde-vien-l-8-de-marzu-como-dia-de-la